

■ GLOSSA

Tgi laschar cresmar?

DA SILVIO CAMENISCH

Laschain nus insumma cresmar? Fiss la pli bella, na laschassan nus betg cresmar sco degns catolics! Nus na savain betg ans du-star da laschar cresmar noss uffants, n'ha il biopur Planta betg savì il medemtar sias nursas. Ha il chaugross stuì laschar vaccinar la finala, stuain nus chausgross laschar cresmar la finala, ma betg dumandai mai, sun betg expert en chaussa. È il vaccinader chantunal vegnì si d'alp perquai tuttina, vegn il cresmader diocesan si plaiv perquai tuttina. In vegn segir. Segir betg, vegn betg ina!

Nus qua a Dentervals laschain, tge vul dir laschain?, faschain cresmar en mintga cas noss anc uvestg Vitus. Tar nus è el cordialmain bainvegnì. Nus quintain cun fitg fitg grond interess medial. Nus qua Survals ans avain segirà noss cresmader preferì avant in onn. Uss essan nus era leds, ils megliers èn dabot davent, quels èn ids ils ultims dis sco paunets chauds. Jau hai udì en l'ustaria Alpina ch'ins haja unshì dus preferids cun crisam monetar, vegnian els dus, betg tschels dus! Tschels dus na lain nus betg! Nus betg.



Nus qua Dadorvals cresmassan quel, sch'el vegniss a cresmar noss uffants innocents. Nus da la musica instrumentala na sunassan betg, vegniss quel. Nus dal chant-baselgia na chantassan betg, vegniss quel. Nus da la cumpagnia da mats, e cumpagnia parallela da mattas, na faschessan betg parada, vegniss quel. Nus schessan tschüss, faschai bun, giessan ordaifer cun noss autos da sport. Cun tals essan nus subit ordaifer la stretgezza da las vals stretgira ed ils bels idioms. Stai bain chars idioms, nus turnain puspè, essan anc adina turnads. Ins sa regorda segir da sias s. ragischs – sin pli tard sin letg da mort sa regord'ins e di il misere-re.

Per laschar vegnir quel, savessan nus gist la-

schar vegnir tschel! Nus savessan laschar vegnir mintgin che vegniss, è er vair! Nus savessan laschar vegnir il Dieu vallesan dal ballapè mundial. Nus savessan laschar vegnir il moderatur da cult dal Musikantenstadl, quel plaschess uss a nus mammas! Ils bainvis moderaturs Epineys tant da la televisun svizratudes-tga sco da la retoruman-tscha laschassan nus vegnir gugent. Omadus fissan bainvegnids a nossa craisma. Ina buna schuppa da giutta survegnissan omadus garantì. Nus lessan vesair els, nus lessan avoir els vivs directamain en nossas stivas, sacra, betg cun Mattscheibe tranteren. Lessan nus betg.

Ozendi chaussa impus-sibla da far endretg a tuts, maindir tuttas. L'individualissem, sco credo da las scolas anavant, musa er tar la craisma sia vairafatscha! Na dastg jau betg avoir mes uvestg, che jau vi, na lasch jau betg cresmar. Jau betg. Jau ma sai er cresmar mez u laschar in da mes gust. Jau sun qua autonom. L'autocraisma betg pli impussibla! Qua sun jau uss egoist, fatsch insatge bun a mamez. La craisma dastga vegnir! Jau sun fit, ès er ti fitta. Jau bain. Auters main.